



# Միսաք Մեծարեւնց

## Իրիկվան ձայներ

Կ'ալեկոծին տարփոտ ձայներն իրիկվան,  
հորձանքին մեջ հոգնակոհակ հովերուն.  
անրջածուփ, նրվաղ բույրերն երերուն  
վերջալույսին մեջ ոսկեգօծ` կը հևան:

Խըրախության աղաղակներ հեշտալուր`  
կը պլլրվին այդ ցնծաձայն նրվագին.  
ու կ'անհետին` մեշն այդ ծըփուն հորձանքին`  
հեշտերգությանց թույլ ծըվեններ կցկըտուր:

Ջիլ գեղգեղներ ու նրվագներ վրդովիչ,  
ու ջութակի սարսուռին գիծը կարմիր...  
Արևնարքին ծաղիկն, որ չի թառամիր,  
ինքն ալ գինով ըզգլխանքեն այս թովիչ:

Աղմըկահար սույն ու արշավն հովերուն,  
հծծյունները ծաղիկներուն խատուտիկ,  
բարդիներու խարշափն ու ծափն հանդարտիկ,  
և համերգը խանդոտ` գետին մոլորուն:

Կըստվարանա ալիքն հրճվոտ այս ճիչին,  
ու կը բախդի հոգվույս պորփյուր քարափին,  
ու կ'ոռոգե գիս փրփուրին մեջ ծըփին

երբ խնկագույն լույսերն ինձմե կը փախչին:

Արծաթ լույսերն հիմակ տակավ կը ծաղկին,  
ու կը ցայտե թավ հեծեծանքն ուտերուն,  
լազվարթ ժամեր լուսնի շիթ շիթ կաթիլքին  
մեջ կը թրթռան իրենց համբույրն անանուն...:

Եվ հոգիներ կ'իյնան անոնց ծնրադիր,  
սիրերգությանց ընպած հըմայքն հըրեղեն.  
պայեր անոնց միստիք ճամփան կը պեղեն.  
ու կը ցնծան լույսով՝ գենիթ ու նասիր:

Ու կը բացվի փալփուուն՝ գիշերն երջանիկ,  
արձագանգներ կը խաղան դեռ հոս ու հոն.  
քերթված մըն է ցայգն համորեն, ջինջ գեղոն՝  
որ կ'երփներգե ծափ ու ծիծաղ ու ծաղիկ: